

# Бахт абадийдир

10:05 / 27.03.2017 2237

(“Ўзим билан танишув” туркумидан)

Иброҳим (алайҳиссалом)ни энг катта гулханнинг ўртасига ташладилар. Жаброил (алайҳиссалом) келиб: “Нима истайсиз, эй Аллоҳнинг расули?”, – деди. “Аллоҳнинг ўзи менга кифоядир”, – деган жавоб бўлди.

Шу тарзда савол уч марта такрорланди.

Жавоб ҳам.

Иброҳим (алайҳиссалом) Аллоҳнинг имтиҳонида эканликларини, Аллоҳнинг ҳукми ҳеч қачон инсонларнинг зарар кўриши учун тақдир қилинmasлигини жуда яхши билар ва шунга тўлиқ ишонардилар. Аллоҳнинг раҳмати қачон, қай тарзда ва қандай шаклда, қайси муносабат билан воқеъ бўлишини банда билмайди. Масалан, оловга ташланиш, денгизга улоқтирилиш ва наҳангнинг қорнида қолиб кетиш, зинданбанд қилиниш бизнинг назаримизда жуда катта мусибатга ўхшаб кўринади. Биз ноқис ақлимиз билан буларнинг барчасини, шубҳасиз, мусибат, жабр, зулм деб тушунамиз ва шундай қабул қиласиз. Яъни булар биз учун баҳтсизлик саналади.

Шайтон баҳт ва баҳтсизлик ҳақидаги асл ҳақиқатдан бизни чалғитиш учун имкони борича ҳаракат қиласи. Шайтоннинг амрига қулоқ тутсак, баҳт – баҳтсизлик, баҳтсизлик – баҳт бўлиб кўринади. Чунки шайтон алдовчиидир. У ҳар кимнинг қон томирида юриб, васвасага солади, тўғри йўлдан оздиришга урунади.

Баҳт қуёшга ўхшайди. У баъзан бизга кўринади, баъзан эса йўқ. Қуёшнинг кўринмай қолиши уни йўқ дейишга асос бўлолмайди. Чунки у ўз жойини ўзгартиргани, йўқолиб қолгани йўқ. Муайян қонуният туфайли бизга бир муддат кўринмай қолди, холос. Кундузи қуёшнинг кўриниб туриши қанчалик улуғ неъмат бўлса, кечқурун бизга кўринмай туриши ҳам худди шундай неъматдир. Кундуз тирикчилик, тун ором учун манзил.

Аслида бахт Аллоҳ таолодан келадиган ҳар бир нарсанинг ўз фойдамиз учун берилган буюк неъмат эканини англашдир. Иброҳим (алайҳиссалом) бу ҳаёт интиҳон майдони эканини ва ўзининг имтиҳон қилинаётганини биларди. Имтиҳон эса одатда инсоннинг юқорироқ босқичга лойиқлигини ўзига билдириб қўйиш учун қилинади. Имтиҳондан муваффақиятли ўтса, даражаси ошади. Кучли олов темирнинг зангини еб йўқотгани каби гулхан ўз қалби ва имонини тоблаши, ярқироқ ва мунаввар қилишини Иброҳим (алайҳиссалом) буюк неъмат деб билди. Унга мамнуният билан рози бўлди ва ундан юз ўгирмади, қочмади. У Аллоҳнинг амри фойдадан ва ҳикматдан холи бўлмаслигига амин эди. Натижада, олов унинг учун ёндирувчи ва куйдирувчи оғатга эмас, салқин ва раҳматга, ҳузур-ҳаловатга айланди. У Аллоҳга чин дилдан ишонгани учун амрига бўйсунди, бўйсунгани учун сабр қилди, сабрига рози бўлди ва Аллоҳ ҳам ундан рози бўлди. Оқибатда, инсоният тарихида ҳали ҳеч кимга насиб қилмаган “Халилуллоҳ” мақомига эришди.

Биз эса Аллоҳнинг раҳматини кўра олмаймиз. Ўзимизда етарли илм ва маърифат йўқлигидан шайтоннинг ёлғонларига осонликча алданиб қоламиз. У бизни раҳматдан юз ўгиришга, бўйин товлашга ва қочишга чақиради. Биз воқеа- ҳодисаларни ақл ва мантиқ билан эмас, ўз аслини йўқотган шайтоний хоҳишлиаримиз билан баҳолаймиз. Буюрилган ва ўзимиз учун фойдали бўлган, ўзимиз чин дилдан истаган қарорни эмас, шайтон бизга тавсия қилган қарорни қабул қиласиз.

Биз одатда ўтга қараганда фақатгина куйдирувчи оғатни, денгизни кўрганда ғарқ этувчини, зинданга юзланганда алам ва хорликни кўрамиз. Шайтон бизни мана шу шакллар билан алдаб қўяди.

Бир табибни жуда оғир беморнинг ҳузурига олиб боришиди. Табиб унинг томирини ушлаб кўргач, бир сўз дейишга чоғландиyo, индамади. Индамай чиқиб кетди. Беморнинг соғайишига умид йўқлиги унинг жимлигидан англашилган эди.

Лекин...

Бемор тақдирга тан берди. Ўз ўлимини кута бошлади. Шу пайт девор кавагидан бир илон чиқиб, у томонга судралиб кела бошлади. Бемор қочмади – қимирилашга мажоли йўқ эди. Илон келиб уни чақиб олди. Бемор ҳушини йўқотди.

Анчадан кейин ўзига келиб, кўзларини очган бемор баданидаги  
касалликдан асар ҳам қолмаганининг гувоҳи бўлди.

Орадан бир неча кун ўтгач, ҳалиги одам кўчада табибни учратиб қолди.  
Табиб унга таажжуб билан тикиларкан, кўзларига ишонқирамас эди.

- Илоннинг заҳрини қаердан топдингиз? - деди ниҳоят табиб тилга кириб.

Киши бўлиб ўтган воқеани гапириб берди.

- Мен сизнинг дардингизга фақатгина илон заҳри даво бўлишини  
билирдим. Фақат уни топиш ва сизга ичириш имконсиз деб ўйлаганим учун  
чорасиз ҳолда уйингиздан чиқиб кетгандим, - деди табиб ҳайрат билан.

\* \* \*

Яхшилар учун яхшиликлар абадийдир.

Ёмонлар учун ёмонликлар абадий.

Икки ўртада сарсон юрувчилар ҳеч қаерда қўним топмайдилар.

\* \* \*

Аллоҳ таоло биз учун нима яхши ва нима фойдалилигини биздан қўпроқ ва  
яхшироқ билади. Аллоҳни бизга атаган нарсаси, шубҳасиз, яхшилик  
бўлади. Ахир қалбида заррача меҳри бўлган она фарзандига ёмонликни  
раво кўрмайдиу ундан чексиз маротаба меҳрибон зот инсонларга  
ёмонликни раво кўрармиди!?

**Ғуломиддин Озод**